

Nicola Gaudenz : 19 avrigl 1901, 7 october 1963

Autor(en): **Murk, Tista**

Objekttyp: **Obituary**

Zeitschrift: **Annalas da la Societad Retorumantscha**

Band (Jahr): **77 (1964)**

PDF erstellt am: **26.04.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Nicola Gaudenz

* 19 avrigl 1901, † 7 october 1963

da Tista Murk

La Società retorumantscha ha pers seis president als 7 october 1963, per consequenza d'ün infarct dal cour, davo ch'el avaiva soffert bainquant ün mais a la lunga, illa patria da sa duonna a Puschlav, ingio ch'el as retraiva adüna in vacanzas ed ingio ch'el eir quista ultima jada speraiva da's recrear d'üna malatia chi l'avaiva turnantà da l'Italia.

Dr. Nicola Gaudenz d'eira naschü als 19 avrigl 1901 a Firenze. Quia passantet el sia prüma infanzia, quia get el a scoula fin a seis dudeschavel an, per cuntinuar alura sia scolaziun a Scuol, sia patria plü stretta, ingio cha'ls genituors cuort avant la prüma guerra mundiala d'eiran turnats a star. Davo la scoula secundara alura get el a Cuaira, e quia fet el l'an 1920 la maturità commerciala, per ir in seguit a stübgjar a Berna e Turich dret ed economia. L'an 1926 glivret el seis stüdis cul doctorat a l'università da Turich e cun la disertaziun davart las finanzas cumünalas da l'Engiadina.

Quant gugent avess il giuven dottur inchaminà la via diplomatica! Las linguas naziunalas savaiva el tuottas. Mo i nun ha vulgü esser. Perquai til inscuntrainsa il prüm per cuort temp impiegà da cancellaria ad Igis, alura, als 1. october 1927, dvainta el secretari dal Departamaint da finanzas dal chantun Grischun. Sia conscienziusità e granda diligenza al permettan ün svelt avanzamaint: Als 10 avrigl 1933, dimena var ses ans plü tard, vain el fingià elet schef da l'Uffizi chantunal d'impostas, in quella plaiv ch'el restet fin a sia mort, stand a la testa d'üna sesantina d'impiegats. Seis pensum creschit an per an adüna daplü, ed eir il persunal s'augmantet da trenta al principi da sia carriera pro'l chantun fin al dubel a sia fin.

Quai sun in cuortischems plets seis svilup sco impiegà e grazcha a sias capacitats e cugnuschentschas da dret ed economia sia collavuraziun füt predschada in plüs roms administrativs sco p. ex. in du-

mandas da la partecipaziun dal chantun e dals cumüns a las oubras electricas. Daspö l'an 1949 fin al 1956 fa'l da president da la conferenza dals impiegats chantunals d'impostas, da commember da la cumischiun masdada per la SVR, da commember da la suprastanza da l'organisaziun svizra per dret d'impostas internaziunal, e l'an 1962 vain el clamà dal Cussagl federal sco expert per la ledscha regard il scumand da dubla imposta. Per nos chantun ha'l preparà las differentas revisiuns (1945, 1962 e 1963) da la ledscha chantunala d'impostas.

Mo dr. Nicola Gaudenz nu chattaiva cumpletta satisfacziun e cuntantezza be in dumandas da professiun. Sia fuormaziun in Italia ed in Engiadina l'avaivan scolà il spiert eir per cultura ed art e buollà seis cour «randulin» cun l'amur per lingua e tradiziun engiadinaisa. Perquai nun aise da's dar da buonder cha'l defunt in seis temp liber ha adüna eir tscherchè da prestar alch per lingua e cultura. Sia prüma actività in quist sen ha cumanzà cun la presidenza da l'Uniun dals Grischs a Cuoir a e gnit cuntinuada in möd significativ per sia iniziativa ed energia instancabla sco chaschier ed alura parsura da la Società retorumantscha. Aint il pream al terz faschicul dal DRG descriva penna plü cumpetenta tuot ils grands meritis da dr. Nicola Gaudenz sco president da la SRR daspö l'an 1955. Nus vulessan be relevar cha perfin in sia operusità per la chosa rumantscha, dr. Nicola Gaudenz nu sentiva cunfins strets e dovairs limitats, e perquai as fet el, cuort avant co murir amo, pledader per la promozziun dals idioticons svizzers insomma, adressand 8 dis avant sia mort al Departamaint federal da l'intern üna istanza concernent la nouva reglamentaziun per las contribuziuns als quatter dicziunaris svizzers.

Chi chi craja cha quistas activitats per chantun e rumantschia hajan svödà tuottas reservas da forza da sar Nicola, as sbaglia. La vita sociala l'ha adüna interessà fich, ed el ha fat part da la suprastanza da la Chascha d'agüd purila grischuna, da la fundaziun Rigahaus, ais stat president d'urant ans da la Società ad ütil public da nos chantun e sco liberal da veglia observanza s'ha'l adüna dedichà eir a problems da sia baselgia; a Cuoir presidet el l'Uniun dals concrets evangelics liberals.

Sper il sacrifici portà per quistas organisaziuns, sar Nicola ha adüna eir pisserà per sia recreaziun in cumpagnia dalettaivla. El füt ün fidel commember p. ex. dal Cor viril da Cuoir e servit a quel pu-

stüt sco Cicerone sün viadis a l'ester. Il «randulin» Nicola Gaudenz ha vita dūranta senti il clom, il chatsch dad ir dalöntschi per imprendi a cugnuscher terras estras, pövels esters. Perquai fet el suvent viadis, in Scandinavia, in Spagna, in Grecia, in Ingalterra — insomma per tuot l'Europa. E co ch'el savaiva giodair quels viadis a l'ester! Nus avain fat cun el be ün viadi, mo quel ans ais amo in-schmanchabel: il viadi al prüm congress ladin internaziunal aint illas Dolomitas. Sar Nicola d'eira ün cumpagn da viadi agreabel, fich versà e perquai buna guida. Seis natüral simpel, seis esser exact e bod bod pedantic in regard bunas manieras e nettaschia, franc e sgür da sai stess, mo adüna buntadaivel, amiaivel e prus — rendaivan il viagiari cun el sulazaivel.

Dr. Nicola Gaudenz füt ün hom da bun cour e spiert cler — puchà ch'el ans stuvet bandunar sül cuolmen da sia actività. Per tant plü impressa ans restarà'la sia memoria, per tant plü da char til salvaran tuot chi l'han cugnuschü. Ch'el posa in pasch!